

altis fundamentis impositam, ut pene plus operis illa haberint, quam id reliquum sit, quod extat. Ejus fastigium, quod ex purissimo fulget auro, in eam assurgit altitudinem, ut non solum urbem, quam circumquaque subjectam habet, contemplari inde liceat, sed ad ortum quoque & meridiem, longe lateque in ipsum mare aperiat prospectum, ita ut ex Histria Dalmatiaque introrsum navigantibus, ad ducenta & amplius stadia fulgor ille, tanquam sidus quoddam salutiferum, occurrat. Polani atque alii non pauci Histriae accolae, latrociniis finum infestabant: in hos Ducis filius & Marinus Gradenicus cum quinquaginta instructis navibus sunt missi: Pola obsideri coepta. Sed sub primam fere obsidionem civibus pacem petentibus, his conditionibus est data, ut a maris infestatione abstinerent: ceterum ut bina millia pondo olei quotannis Divi Marci fano inferrent. Parentini quoque & ipsi pari metu perculsi, si quando Dux ad bellum iret, auxilia pollicentur: Hemonienses & auxilia & annum olei tributum: quibusdam etiam accepti imperii confessio expressa est, vectigalium immunitate Venetis negociatoribus promissa. Anconitani per id tempus in Venetorum societatem venire: & cum Guilelmo Siciliae Rege, qui Rogerio successerat, foedus percussum: atque ob hoc ipsum multae ab eo immunitates Venetis negociatoribus, Siciliae emporia frequentantibus, concessae. Anastasius Romanus Pontifex, Venetis annitentibus, Jaderensem Ecclesiam Metropolitanam declaravit: cui omnes Insulanas urbes proximo tractu adjacentes subjecit. Libet suspicari, id non tam Jaderensium gratia factum, qui tum parum integrae fidei in Venetum imperium habebantur, quam in reliqua Dalmatiae invidiam: quae per id tempus a Venetis magna ex parte alienata, sub Pannoniae Regis erat praesidio. Quod si ita est (nam non desunt, qui hoc quoque scribant) omnino negaverim, Spalatum, Tragurium, aut oppidum Dalmatiae ullum, praeter Jaderam a Dominico Michaeli ex Syria redeunte receptum; aut certe Vitalis Michaelis secundi temporibus ea declaratio facta est: quo Duce Tragurium, Spalatum,

1149

1150

*Plerique
Histriae po-
puli tribu-
arii facti.*

1151

1154